

Reformasi ekonomi desa cetus keadilan sosial luar bandar

• Kewujudan ekosistem perniagaan dan pelaburan kondusif di desa membolehkan pelaburan projek berimpak tinggi dan meningkatkan peluang baharu kepada PMKS tempatan

• Memperkasa ekonomi desa adalah satu tindakan strategik dari segi dasar ekonomi kerana ia sinonim dengan sektor pertanian, membabitkan isu sekuriti makanan

Oleh Prof Madya Dr Irwan Shah Zainal Abidin
bhnews@bh.com.my



Pensyarah Pusat Pengajian Ekonomi, Kewangan dan Perbankan, Universiti Utara Malaysia

Sekali lagi, Belanjawan 2023 adalah belanjawan mengembang dengan peruntukan sebanyak RM388.1 bilion. Apa yang lebih menarik lagi adalah perbelanjaan pembangunan dirancang dengan dana RM97 bilion, peningkatan ketara dari tahun sebelumnya, manakala defisit kewangan pula dijangkakan dikawal pada kadar 5.0 peratus kepada Keluaran Dalam Negara Kasar (KDNK).

Jika belanjawan ini ingin memperlihatkan satu bentuk terjemahan kebijaksanaan baharu, usaha adalah reformasi pembangunan desa untuk satu elemen sangat kritikal serta sesuai dengan kerangka MADANI diperkenalkan.

Atas sebab itu jugalah dalam konteks ini, pentinglah belanjawan berhubung dengan, terutama dalam peruntukan tinggi dalam aspek perbelanjaan pembangunan.

Hakikatnya, penumpuan kepada perbelanjaan pembangunan ini akan memberikan nilai penganda tinggi kepada ekonomi yang sebenarnya adalah bentuk pelaburan produktif kepada rakyat, terutama penduduk desa.

Pemeriksaan ekonomi desa ini sangat relevan sebenarnya jika dilihat dalam landscape ekonomi global dan ekonomi domestik pascapandemik.

Trend ekonomi global pascapandemik lebih menjurus kepada fenomena globalisasi serta penumpuan kepada nasionalisme ekonomi dan juga inward-looking dari segi orientasi.

Maka, untuk mendepani cabaran ekonomi penuh dengan ketidakpastian dan kompleks ini, sememangnya kita perlu memperkasa ekonomi domestik dan meningkatkan lagi daya kekuatan ekonomi yang sudah wujud serta mempunyai potensi baik pada masa hadapan, seperti memperkasa ekonomi desa itu sendiri.

Dari sudut cabaran ekonomi domestik, isu kos sara hidup yang tinggi, inflasi, kemiskinan tegar, sekuriti makanan, bencana alam, pembangunan hijau dan mampan, mempunyai kaitan dengan aspek pembangunan desa jika dilihat dari sudut penyelesaian jangka sederhana dan panjang.

Begitu juga dengan isu lebih spesifik kepada kawasan desa, berkait dengan penoreh getah, nelayan, pesawah atau masalah sekolah dan klinik masih dalam keadaan daif.

Dalam konteks mereformasi ekonomi desa ini, isu pokok perlu difikirkan adalah bagaimanakah pembangunan desa ini dapat mengurangkan kesenjangan pembangunan sosioekonomi antara kawasan bandar dan luar bandar.

Apakah jalan terbaik untuk memastikan pekebun kecil getah, pesawah misalnya, mendapat pembealaan sewajarnya dalam arus pembangunan negara yang mana sepanjang empat dekad lalu lebih tertumpu kepada agenda industrialisasi sehinggakan sektor pertanian diabaikan.

Apakah akan ada satu bentuk perubahan trend dari segi migrasi berbanding sebelumnya luar bandar ke bandar, menjadi bandar ke luar bandar?

Adakah mungkin pembangunan desa menjadi pencetus kepada pembangunan model ekonomi kitaran yang mempunyai nilai koridor penggunaan lestari atau *sustainable consumption corridors* untuk memastikan pembangunan desa mampan, sekali gus mencapai 17 Matlamat Pembangunan Mampan (SDG) di bawah Agenda 2030 bagi Pembangunan Mampan (Agenda 2030).

Dalam Belanjawan 2023, sebanyak RM11 bilion diperuntukkan kepada Kementerian Kemajuan Desa dan Wilayah (KKDW), peningkatan RM500 juta daripada peruntukan dalam Belanjawan 2022.

Jika keadilan sosial menjadi antara satu daripada tunjang utama dalam Belanjawan 2023 ini, mereformasi ekonomi desa adalah satu tumpuan dan keutamaan tepat.

“Tiada yang mustahil aktiviti penjaan sumber tenaga baharu untuk mencapai agenda kemampanan dimulakan di kawasan desa”

Tindakan strategik yang tepat

Memperkasa ekonomi desa juga adalah satu tindakan strategik dari segi dasar ekonomi kerana ia sinonim dengan sektor pertanian, membabitkan isu sekuriti makanan.

Ja juga berkait rapat dengan isu kemiskinan, ketidakseimbangan dalam alihan pendapatan, pembangunan, bencana alam, pemampanan, begitu juga dengan sektor serta projek pembangunan tidak berbentuk mega.

Dari aspek peningkatan produktiviti negara, galakan dalam aktiviti inovasi, serta lonjakan dalam daya saing serta kreativiti ekonomi melalui pembangunan desa adalah sangat signifikan.

Selain itu, tiada yang mustahil aktiviti penjaan sumber tenaga baharu untuk mencapai agenda ke-

mampanan dimulakan di kawasan desa.

Bagi meningkatkan produktiviti masyarakat setempat, ia boleh dilakukan dengan membangunkan ekonomi berasaskan pengetahuan, menarik minat pekerja mahir mempunyai kepakaran untuk menetap di luar bandar dengan kualiti hidup lebih baik dan selesa jika dibandingkan dengan kawasan bandar bagi menjalankan aktiviti penyelidikan dan pembangunan (R&D) di desa, terutama untuk merealisasikan agenda pertanian moden dan pertanian pintar.

Dengan adanya ekosistem perniagaan dan pelaburan kondusif di desa, ini membolehkan pelaburan projek berimpak tinggi serta mampan dilakukan, sekali gus meningkatkan peluang baharu kepada perusahaan mikro, kecil dan sederhana (PMKS) tempatan dan penaja kecil di desa.

Berikut juga peluang pekerjaan dengan gaji lebih bermaruah kepada penduduk tempatan, yang mana dapat menyelesaikan isu kos sara hidup tinggi, pengangguran dan guna tenaga tidak sepenuhnya, terutama generasi muda, serta mengurangkan keberuntungan ekonomi kepada buruh asing.

Penyediaan geran sepadan sebanyak RM50 juta untuk menggalakkan automasi sektor perladangan melalui penggunaan robotik dan kecerdasan buatan (AI) dalam Belanjawan 2023 ini amat baik dalam konteks membina ekosistem perniagaan dan pelaburan kondusif. Ini diharap akan dapat mengukuhkan lagi industri hiliran dalam sektor perladangan di kawasan desa.

Begitu juga reformasi sektor agrikultur terkandung dalam Belanjawan 2023, dilihat kritikal dalam usaha untuk meningkatkan tahap kemandirian pengeluaran makanan tempatan.

Tumpuan strategi dalam belanjawan ini adalah melalui automasi dan pendigitalan. Pelbagai dana, insentif, latihan dan bimbingan disediakan.

Selain itu, usaha meningkatkan penggunaan tanah bagi tanaman makanan berbanding tanaman sawit dan getah juga diperkenalkan.

Semua ini dijangka dapat menarik minat pelaburan swasta berskala besar melabur di kawasan desa dan akhirnya dapat memberikan impak positif kepada pembangunan ekonomi desa secara tuntas dan holistik.

Akhirnya, fokus lebih terarah kepada pembangunan ekonomi desa dalam Belanjawan 2023 ini dilihat sebagai strategi baharu menangani isu ekonomi rakyat dan negara berbilang *bottom-up*.

Ia adalah satu pendekatan lebih mampan dan alam sekitar untuk mengukuhkan daya tahan serta daya saing ekonomi negara sebagai batu asas penting ke arah pembentukan model ekonomi lebih mampan pada masa hadapan.

Semua artikel penulis tamu adalah pendapat peribadi, bukan pendirian rasmi BH